

清光緒朝中日交涉史料

卷四七之卷四八
二十一年

清光緒朝中日交涉史料卷四七

(三三二八九)軍機處電寄許景澄諭旨

光緒二十一年七月初四日
電寄檔

奉旨許景澄電悉歸遼之議發自俄廷若仍賠費則於俄之初意未合且於中國交誼亦未爲完足現在德既鬆口即當趁此定議一面令日本將遼地交還一面由中國將首二兩期兵費一併交付如此則於日有益於中無損而俄國從中說合亦易於措詞該大臣膺此重寄務與羅拔悉心密商使遼地早歸賠費悉去以符前此操縱之說方爲妥善欽此七月初四日

(三三二九〇)翰林院代奏編修李桂林等條陳摺

光緒二十一年七月初五日

大學士翰林院掌院學士臣宗室麟書等跪奏爲據情代奏恭摺仰祈聖鑒事竊據臣衙門編修李桂林編修胡景桂編修王廷相編修鹿瀛理編修徐世昌編修陸鍾琦編修許葉芬編修朱錦編修劉若曾編修孟慶榮檢討閻志廉編修趙士琛檢討蔣式理等呈稱竊維直隸者股肱之郡海防者門戶之司股肱有關而職事墮門戶不謹而寇敵生自李鴻章任事以來二十有餘年矣縱使曲爲原諒亦無善政之可名致使畿輔重地盜賊內斥強國外侵

荼毒被於生靈震驚及於宗社此天下所共見人心所共知非李鴻章之咎而當誰咎者乃該大臣猶復倚權怙勢恥過作非去歲之議戰也屢違諭旨而不肯實力奉行今年之議和也久稽重命而不肯來京覆奏卽謂其心尙無他豈復有人臣之禮且全權大臣者議和之專司耳不得兼其舊職也署理總督自有王文韶而藩司陳寶箴參劾劣員李鴻章輒敢抑其奏督辦軍務自有劉坤一而提督王得勝招募新勇李鴻章若故張其權是直視直隸總督爲己之家私視北洋大臣爲己之故物雖回任未奉明旨而請假仍自攬權天下臣民莫不惶惑况乎生長於邦畿能無切膚之痛耶此時李鴻章之進退關大局之安危卽就直隸一省而論其必不可回任者亦有兩大端一則曰吏治州縣親民之官而李鴻章純用私人膏腴之邑衝要之缺密布稠羅非其姻婭之小人卽其奔走之下隸致令直省仕宦有徽班之目此等恃其袒護任意妄爲暴斂橫征匿災諱盜或勒索富室以飽其貪或淩藉紳衿以肆其虐直隸風俗馴良向少揭告官吏之習屈意忍受茹苦含冤前任旣剝其膚後任復椎其髓所積已久民不聊生其緝捕則官吏通受盜賄縱使遠颺揭竿持挺之徒倏忽往來成羣作黨其潛匿深禾出而白晝搶刦者謂之高梁王其擄人勒索者謂之趕肥豬又謂之請財神近來此案層見迭出則捕務之廢弛可知矣其河渠則不循水性橫築隄防禦北則移

諸南鄰捍西則移諸東境水失故道縱橫肆潰大名道吳廷斌本無治水之能以趨承李鴻章大受委任又復引其私人潘陶鈞等包攬利權侵吞巨款任河自決領帑銀以冒利俟水自涸築浮土以冒功向來直省苦旱爲禔近則無歲而無水患人謂水患自李鴻章始則河渠之失道可知矣其賑濟則上施實惠下受虛名或藉名差徭扣留或竟爲官吏吞蝕天津籌賑局歲積巨款委辦局員巧爲牟利以直隸人不能食稻乃賤糶精糧貴糶粗糲一出一入侵剝已多又或竟不存米以銀存匯豐號經營子母卽以積款捐官到任而後衆夥分肥置民瘼於不問官則鳴騶載道民則餓殍在途此其尤可慘痛者也李鴻章吏治不修至於如此一日海防李鴻章名爲通洋務創立新章名目甚衆其立武備學堂延法國李保爲教習三年旣滿該教習情願再爲報效以不合於丁汝昌遣令歸國其海軍副提督琅威哩技藝旣精忠誠可倚以節省船費與丁汝昌爭論不下亦復遣去從此人無約束坐糜廩餼履組曳絲酣歌恆舞養成驕惰疲頑之習以故臨敵一無可用其機器局東廠歲費十數萬兩南廠亦七八萬兩計已費三百餘萬去歲有事始知未嘗造一鎗製一礮雖有子彈並不合膛藥力復不能及遠以致前敵諸軍紛然藉口要其每戰失利亦未嘗不由於此大東溝之役頗爲得力以無炸礮不敢再追此其誤事之明驗也其鐵路則商路創辦之初每里用七

千餘兩洎乎續修官路借資熟手宜其工省而價廉乃以六百餘萬之費僅修鐵路二百里計其實在到工者不過十之二三而已且火車包載貨物逐日進款到本之外當有贏餘乃數年來毫無報效復歲領津貼二十萬此何理歟其電報則分官商兩局公事由官電行者不予費由商電行者仍復予費年來電信暢行亦當有利而所積之款盡入盛宣懷一人之手此猶其末也去年之事初起則內地舉動消息皆通於外及至關外失利正當我軍書火急之時而電綫則節節告斷矣不知此局竟爲誰設李鴻章海防之貽誤有如此者今皇上勵精圖治發憤自強登進善良黜退奸佞海內翕然有望治之心獨李鴻章久據要津橫塞賢路此天下之人所躊躇而觀望者也藩司陳寶箴臬司朱靖旬皆有賢能之稱聞二人曾參奏李鴻章倘該督復回本任此二人必首先告退山東與直隸爲鄰李秉衡亦必不能安其位南洋北洋交涉甚多恐張之洞亦受其牽制矣或以李鴻章所任甚鉅恐繼者難其人不知公忠體國實心任事者非竟無人但使開誠布公不徇情面俾牟利自肥之輩無地可容卽能漸挽頽局若李鴻章薰心富貴功敗名裂之後斷難以晚蓋相期卽令其雄偉冠時而不遵朝命其材益爲可慮耳又以李鴻章經此挫折自當悔艾此又附和之言非其實也曾見所刊五次問答其對伊藤云中國素未準備與外國交爭所招新兵未經訓練該督經

營海軍陸軍二十餘年而言素未準備是其溺職已親供矣又云貴大臣雖有難爲之事賴貴國皇能聽善言又云貴國皇宵旰勤勞不勝欽仰夫以人之國皇能聽善言豈以我皇上不聽善言耶人之國皇能宵旰勤勞將以我皇上不宵旰勤勞耶此其不職之狀怨懟之詞公然洩諸外人刊爲書冊以廣爲流布是直謂天下無人莫我誰何也而猶望其改過自新不亦難乎且該大臣素挾外洋以自重若使復回本任是洋人之所利中國之所大不利也昔魏相張儀以媚秦可爲殷鑒矣桂林等生長畿疆見聞較切不憚披肝瀝膽瀆陳於皇上之前伏祈宸斷或援李瀚章之例令其養疴歸里或爲予告大學士來京以食俸但使兵事民事均不得與聞則畿輔幸甚天下幸甚等語呈請代奏前來臣等公同閱看係爲地方大局起見不敢壅於上聞相應鈔錄原呈恭摺具陳伏乞皇上聖鑒謹奏光緒二十一年七月初五日大學士翰林院掌院學士臣宗室麟書協辦大學士翰林院掌院學士臣徐桐

(二三九一)吏科掌印給事中余聯沅奏李鴻章不宜回任北洋大臣摺

光緒二十一年七月初五日

吏科掌印給事中臣余聯沅跪奏爲北洋逼近京師關繫重大督臣不宜回任懇恩量移邊

遠以殺權勢而予保全恭摺仰祈聖鑒事竊以大學士李鴻章糜餉債軍款倭蠹國前經臣與科道合詞糾參請旨立予休致此在臣等鋤奸除佞盡其職所當言第揆諸我皇上優禮大臣之心追念前勞似不肯遽行罷斥惟李鴻章身居首輔總筦北洋自以爲智莫己若矣而臣獨以爲天下至愚者亦莫該督若也假使倭事初起李鴻章卽運籌帷幄不煩一兵不折一矢制勝於萬里之外如韓琦之偪西夏寇準之服契丹豈非隱然柱石之臣不然當朝鮮被脅高陞被擊之際李鴻章卽自請督師親臨前敵本方叔元老之猷勵三軍同仇之志士氣百倍何難掃穴犁庭卽令不勝抽光弼之韓刀效先軫之歸元豈不垂光青史凜凜然有生氣又不然值旅順威海奔敗之餘奉明詔使絕域以至誠孚之以正論折之俾該倭歸侵地如曹沫滅歲幣如富弼不許則以死爭之非但壯中朝之氣而且馳四海之聲乃皆計不出此始則廢弛因循而坐失事機繼則幸災樂禍而陰圖言中終則恫喝以張敵餒要挾以敝朝廷雖云不忠於國家然其自爲謀則亦左矣位極人臣不思光日月而壯河山乃甘心爲千古不韙之奸邪不恤人言並不畏國法是該督自以爲操術甚工而不知其拙也自以爲藏身甚密而不知其疏也我皇上洞燭其奸卽投諸四裔肆諸市朝律以應得之罪該督亦俯首無辭惟聖恩高厚曲予優容亦天下臣民所共見乃近聞該督盼望回任甚切並

日促王文韶自請交卸是其貪戀權勢老而彌篤若卽令回任該督驕蹇性成恐仍無感激馳驅之心且慮援其子經方以爲代又將盤踞恣肆至死而不悔若不令回任該督素挾外夷以自重難免不倒行逆施嗾令各國環請而要求以遂其無厭之欲不可不預爲之防臣愚以爲該督心旣叵測又復怨望北洋直督關繫緊要旣不可令回任聖德如天又不遽予罷斥求一善處之方莫如置諸邊遠之地合無仰懇天恩飭將該督臣李鴻章調任雲貴總督俾仍膺節鉞之榮而隱杜缺望之心並漸解其把持之柄庶保全其末路而國家不至再受其禍斯則天下臣民之幸也臣愚昧之見冒死瀆陳不勝激切屏營之至是否有當伏乞皇上聖鑒謹奏光緒二十一年七月初五日

(三三九二)吏科掌印給事中余聯沅請慎簡大僚摺

光緒二十一年七月初五日

吏科掌印給事中臣余聯沅跪奏爲治理首貴得人賢否視其所主籲懇宸斷勿驚虛名而求實獲恭摺仰祈聖鑒事竊臣恭讀本年閏五月十三日諭旨飭令中外臣工保舉人才仰見聖明求賢若渴集思廣益之至意曷勝欽佩惟君子易事而難說賢人難進而易退伏見今日之各部院堂官及各直省將軍督撫等平日深入簡出旣不留心人才而趨承左右者

非阿諛逢迎之輩卽脂韋輒媚之流縱有一二耿介拔俗之操携異殊尤之士非但不爲之用亦且無自而知責以保舉臣恐訑訑之聲音顏色拒人於千里之外登剡牘者盡私人貢明廷者無俊彥其弊更不可勝言矣微論其他卽如李鴻章劉坤一王文韶等現爲督撫之冠朝廷倚畀不爲不專封疆蒞任不爲不久試問其夾袋中果有器識閎通才猷卓越體用兼備者乎又問其幕府中果有奇才異能精於天文地輿算法格致製造諸學者乎上以實求而下不以實應將益開奔競之門而長夤緣之漸彼所爲真才者或伏處於巖穴或沈淪於下僚愈隱閤而無以自見甚非國家之福也竊以爲人才之否塞至今日而已極矣倭事之興忽戰忽和毫無主見先旣乏未雨綢繆之策後亦鮮臨機應變之謀是佐治無人才也添兵數十萬招募數百營各雄其智漫無統攝求一督師而難其選是將帥無人才也牙山敗平壤潰旅順棄威海失未交一鋒望風而避是陸軍無人才也定遠鎮遠船非不堅又輔以魚雷水雷礮非不利始則潛蹤不出繼則拱手與敵是水師無人才也至假以予奪之權優以方面之任崇高自恣展布無聞則封疆又無人才也承宣者無實政折獄者少精心仰大吏之顏曠自己之職是監司亦無人才也計缺分之肥瘠忘民生之休戚培克以事長官殘酷而爲能吏是守令更無人才也至於見倭卽逃棄城而遁除左寶貴鄧世昌外無一死

難之臣是人不知有氣節賄賂公行上下交征此次償倭之款並聞內外各大臣有扣利買股之謠是人不知有操守謀差謀缺百計鑽營甚至暮夜乞憐無所不至是人不知有廉恥夫人至於氣節隱操守弛廉恥喪舉天下靡然從風誠不知流極伊於胡底於此而欲振興之激勵之若仍責目今之大吏亦不過保舉一二庸流以遂其植黨營私之計非援引門生卽照應同鄉安能有真識安所得真才求其本以人事君之義則恐未之有聞也此臣所以恭讀詔旨始而喜繼而思終不能不爲之徘徊而太息者也論者謂此次創鉅痛深必須改絃易轍而後可自強至欲盡廢科目而專師西法此亦齊未之議而非揣本之言也夫科目誠有弊廢科目豈遂無弊乎以科目進者曰束縛於帖括詩字之中盡銅蔽其聰明材力之用故泄事而不知應變臨民而不克理煩迂腐無能遂羣焉以爲詬病然而有志之士則博覽羣書以充其學擴其識本其所蘊蓄大可以安天下小亦可以宰一邑卽勦平髮捻各逆如曾國藩胡林翼左宗棠等皆科目中人何嘗不卓建奇勳立膺懋賞若專師西法則務爲淫巧日趨功利以僥倖行險之徒爲機械變詐之習久之則耳濡目染日新月盛將不識六經爲何物五倫爲何事勢必盡棄夫禮義並不知有君父此其弊較科目爲更甚而其害爲尤烈故救弊之方不在廢科目而在求實際不在師西法而在正人心此其權惟皇上能操

之亦惟執政能佐之果任用之大臣皆賢則所舉無不賢苟任用之大臣有不賢則所舉未必皆賢惟賢能知賢亦惟賢能薦賢不然虛應故事而徒託空言博求賢之名而不能獲用賢之實雖步武泰西而事事效法亦不過如虎賁之貌似中郎而已究何裨於治理又何能以自強夫外洋自強之道不過實事求是雖嗜利之心不減中國而綜覈名實則非中國所能及若不師其實而僅師其文恐將虛糜夫帑項而祇自便其私圖徒變亂夫舊章而轉自忘其根本是心術之邪正不關科目之廢興亦在乎用人者辨之而已今奉旨責令中外大臣各舉所知原期求真才而收實效第恐仍蹈舊習各私其私而熱中干進之徒反益甚其狗苟蠅營之弊惟有仰懇我皇上運如神之智推不貳之心慎簡大僚如外而督撫內而卿貳必實有聞望素著才德兼優者方畀以重任然後責以保舉人才庶幾由公生明轉相汲引皆足備緩急之用以仰副聖朝明目達聰之意而自強之道於是乎在卽得人之盛亦於是乎可卜矣臣愚昧之見是否有當伏乞皇上聖鑒謹奏光緒二十一年七月初五日

(三三九二) 附件一 余聯沅奏歸遼不宜添費片

再倭以全力敵我我卽以全力受其敵此句踐所以臥薪嘗膽不能一日忘者也乃俄促其

歸遼而倭遽欲添費夫竭中國之力賠二萬萬之款尙不足以易遼而又復索五千萬在倭之貪得無厭原不足責第俄以遼南與賠款合之可爲我操縱之權而我乃分爲兩事以墮其要求之術是當局之迷每不敵旁觀之智久則俄之心將懈而倭之謀又生聞倭有使臣木希基理往俄游說勸俄收取滿洲之地開造鐵路由悉畢利至伊爾庫次克過滿洲直達太平洋與倭分海陸之利同霸東方俄臣伯爵伊格素號喜事聞頗重其說在倭人險毒很驚旣已曜英又欲結俄幸俄現尙不至盡爲所動若能趁此時速遣舌辯之士至俄感之以至誠聳之以大義在俄與我素無衅端或可爲我盡力以全收遼南之地而不至另索鉅款倘倭不交地我卽不交此先約五千萬之款請俄爲我居間以轉圜而倭亦斷不敢因我以開衅於俄未嘗不可就我範圍而速藏歸遼之局聞議者欲不候九月之約先期交款倭狡詐多端能保其遽還遼南乎且倭以遼南一隅之地竟欲再索鉅款尤出情理之外昔乾隆時收新疆開地二萬里所費不過數千萬今歸我數城於二萬萬外又加五千萬是直以中國爲可欺許之則款難籌不許則地不歸試問當事者將何以策之不能先事預防遽以和爲可恃彼方添兵築壘我乃撤勇弛備索求稍不如意衅端又從此開試問當事者又將何以待之竊以二萬萬之款亙古未聞竭四海不能償徵論遼南數城卽更有大於遼南者

我卽以五十萬籌兵籌餉亦不難於恢復乃竟爲是竭澤而漁之舉倭之計誠毒矣然無李鴻章協謀亦未必如是之甚也此時守約無此財力背約又無此兵力掘鼠羅雀患方急於目前民窮財殫禍更深於日後當事者皆年齒垂暮之人恐不及見矣我皇上春秋鼎盛來日方長能無貽君父無窮之悔乎此臣所以夙夜彷徨而不能不爲是杞人之慮者也是否有當謹附片瀆陳伏乞聖鑒謹奏

(三三九三)翰林院代遞編修丁立鈞等條陳時務呈文

光緒二十一年七月初九日

大學士翰林院掌院學士臣宗室麟書等跪奏爲據情代奏恭摺仰祈聖鑒事竊據臣衙門編修丁立鈞等六十八員呈遞條陳一件恭請代奏前來臣等公同閱看關係時務不敢壅於上聞謹將原呈封呈御覽所有據情代奏緣由理合恭摺具陳伏乞皇上聖鑒謹奏光緒二十一年七月初九日大學士翰林院掌院學士臣宗室麟書協辦大學士翰林院掌院學士臣徐桐

翰林院編修丁立鈞等呈爲大臣誤國至深萬難復用懇請及早罷斥以保臣節而維大計
迫切瀝陳恭請代奏仰祈聖鑒事竊聞大學士李鴻章以款議既定籲求復命仰蒙俞旨准
其前來朝廷處置臣下之權自必斟酌盡善本非一二小臣所敢過慮特是該大臣歷年之
居心行事人神怨憤海內痛心茲者使事旣畢偃蹇天津始而託病繼而銷假無非一再嘗
試以待恩命之速加迨至回任之旨數月未下不得已始迫而爲入覲之請此其意不過欲
速還其祿位長保其權勢而已鄙夫患失無足深論惟念國威挫損之餘創鉅痛深正我君
若臣臥薪嘗膽昕夜淬厲之日若再勿仲乾斷仍舉軍國重要委命於衰庸貪詐之鄙夫祖
宗艱難創業之天下豈可一誤再誤聽其坐壞於一人之手李鴻章行私罔上辜恩誤國罪
實罄竹難書在廷諸臣早已累疏上陳毋庸多瀆但以今日之時勢而論李鴻章有萬不可
回任必當速行罷斥者敢爲我皇上敬陳其要從來立國之道首在強兵况當四鄰交侵軍
旅尤爲要務李鴻章養淮軍三十年辦海軍亦十年天下之兵權一人筭之天下之利權亦
一人筭之糜費餉項以萬萬計及至有事而潰敗決裂乃至如此今欲責以後效望其幡然
改圖該大臣不能整頓於精力強盛之年而欲收晚蓋於桑榆將盡望實交喪之日其必無
希冀明矣此不可復用者一也大臣乃心國事全在識拔人才李鴻章自辦北洋以來非鄉

人不用非私人不用非貪利無恥之人不用去年東事之起其所倚仗者文員如龔照璜張士珩馬復恆牛昶昞武員如丁汝昌葉志超衛汝貴衛汝成黃仕林趙懷業輩皆潰逃降匿貽笑中外其偶未敗露者不過幸而不遇敵耳賞鑑如此何能獎進真材此不可復用者二也自古任大事者必以公正廉潔爲本李鴻章服官三十餘年家貲不可勝計其寄頓外國者至千數百萬遂爲借寇齎盜之媒聞每年淮軍專餉該大臣例扣入己者十八萬兩此外尙有四成公費亦飽私橐至於修一礮臺購一兵船承辦鐵路工程經手洋債事件靡不浮銷濫支肆意侵冒凡在天津充當文武要差者類皆積貲百萬朋比營私久成痼習安望洗心革面盡改前非此不可復用者三也尤有甚者國家多難之會全賴數大臣以忠義爲之倡而後可以感動士氣激發人才咸同之際髮捻交訌得僧格林沁胡林翼曾國藩諸臣協力一心卒戡大難今李鴻章不師諸臣之軌轍專以權力相傾軋以富貴相誇尙外呢異類內進檢人平日告誡將吏無一講明忠孝之語以致淮軍將士罔知大義至有臨敵譁叛全營降賊者而李鴻章每奉朝旨倨慢不恭怨望之言流傳遠近漸不可長何以昭示來茲此不可復用者四也凡此情形海內早已周知而朝廷仍曲予優容不遽加譴罰者不過謂其曾更兵事熟悉洋情與夫通曉西法可備目前緩急之用耳不知李鴻章預平髮捻頗著微

勞平日藉其虛名或可震懾一二自上年平壤之敗九連城之敗以及大連旅順威海先後數戰淮勇伎倆業經罄露無餘三尺童子尤知訕笑況該軍之起本倚洋人爲重故一聞海上交兵早已不寒而慄甲申往事已有明徵人望旣虧國威隨損此練兵一事斷難望其起色者也李鴻章自命熟悉洋務凡事輸情外人而卒不能得彼中之情實歷來交涉事件不聞偶有爭持本年使倭議和所許條約駭人聞聽卽如遼南之地俄人尙能爲我索還而李鴻章危詞恫喝唯恐送之不速割之不盡甘心外向貽禍無窮一切聽彼施爲尙復何所顧惜此洋務一層斷難責其補救者也自通商開辦以後一切軍旅工作之事皆李鴻章總之製造軍械修理船臺以及招商電報諸局無一非其經手乃至去年有事軍火槍械仍復買之外洋天津歷年製造之物不聞有一槍一彈撥入他軍者威旅堅臺不發一砲海軍戰艦拱手讓人至如商電各局原爲收回中國利權乃創辦多年款則領之官本利則全歸私家似此西法亦復何用此工商製造各事斷難收其實用者也李鴻章此次來京必有投時之條陳過人之識議卽所敷奏而論未始不可聳動聽聞竊謂李鴻章無所陳奏則已設有建白必其左右交通外國之漢奸把持洋務之市僧爲之區畫籌策條晰時務冀爲僥倖回任之階朝廷設稍信其浮言則邪黨又從而滋熾矣該大臣年逾七十血氣已衰度其戀棧之

心未必不因之稍淡無如貪賴子弟罪廢閒員洋行駙僧之流親戚佞邪之輩平時把持盤踞倚北洋爲利藪誠恐兵柄一解之後更無有能招權罔利盡使其富貴之私圖者此尤不可不爲熟察者也總之李鴻章貽誤大局罪無可逭若以祖宗成憲而論豈能倖逃失律之誅卽蒙皇上寬仁前勞勿棄亦懇准其原官休致放歸田里俾得保全末路與恩禮相終始勿復以負罪餘生重誤軍國大計倘內而樞譯要地外而海疆重寄再用此衰庸貪詐之鄙夫則時局愈不可問矣職等爲預防後患起見謹合詞籲陳伏祈皇上聖鑒謹呈編修丁立鈞編修李桂林編修周克寬編修胡孚宸編修劉永亨編修支恆榮編修朱福銑編修胡景桂編修熊亦奇編修陳榮昌編修曹福元編修彭清黎編修王廷相編修周承光編修楊天霖編修宋伯魯編修徐世昌編修鹿瀛理編修馮煦編修徐受廉編修柯劭忞編修沈曾桐檢討黃紹曾編修傅世煒編修張鴻翊編修張澂編修朱錦編修陸鍾琦編修劉若曾編修葉昌熾編修段友蘭檢討勞肇光檢討梁燮藻編修謝佩賢編修朱益藩檢討閻志廉編修宗室寶熙編修趙士琛編修杜彤編修吳士鑑檢討蔣式瑔編修王會釐編修劉廷琛編修程友琦編修李家駒編樂王廷鈺檢討張林焱編修宗室寶豐修撰駱成驥編修王龍文庶吉士李瑞清庶吉士廖基鈺庶吉士李于鐸庶吉士吳鈞庶吉士羅經權庶吉士楊錫霖庶